


PROGRAM SEMPENA SAMBUTAN BULAN-BULAN AL-QURAN



*Bacalah (Wahai Muhammad) Dengan nama
Tuhannu Yang menghidupkan (kehidupan makhluk),
Dia menghidupkan manusia dari perut rahim baka,
Bacalah, dan Tuhannu Yang maha pemurah,
Yang mengisytia manusia melalui pena dan tulisan,
Dia menghidupkan manusia apa yang tidak diketahui.*

Bacalah Al-Quran (ayat 1-5).

Program Pembacaan Kitab bermula seperti berikut :

- i. *Bacaan Kitab Al-Wasatiyyah Al-Islamiyah*, karangan Prof. Dr. Yusuf Al-Qardhawi

Tarikh	Tempat	Masa
21 Julai 2011	Auditorium MPSP, Bandar Perda	8.00 pagi hingga 5.00 petang

- ii. *Bacaan Kitab Mukhtasar Itqan Fi 'Ulum Al-Quran*, karangan Imam As-Suyuthi

Tarikh	Tempat	Masa
13 Ogos 2011 dan 14 Ogos 2011	Masjid Negeri Pulau Pinang	9.00 pagi hingga 5.00 petang

Hafazan dan Talaqqi Al-Quran

Program ini bertujuan melahirkan Huffaz al-Quran daripada kalangan pegawai masjid. Ia juga bagi memantapkan keterampilan para imam melalui bacaan yang baik dan berkualiti. Ia diadakan pada setiap hari Isnin, Khamis dan Sabtu bertempat di Masjid Negeri Pulau Pinang, bermula pada 3 Jun 2011 hingga 17 Ogos 2011.

Tahsin Al-Quran

Program ini terbuka kepada pegawai masjid di Pulau Pinang yang dijalankan secara teori dan amali serta bertalaqqi.

Tarikh	Tempat
23 Julai, 20 Ogos & 10 September 2011	Masjid Seberang Jaya, Masjid Bandar Baru Air Itam & Masjid Daerah SPS

Kursus Bahasa Al-Quran (Bahasa Arab)

Program ini bertujuan memberi pendedahan mengenai pembelajaran asas Bahasa Arab dengan sistematik di samping untuk meningkatkan penguasaannya dalam memahami dan menghafaz al-Quran.

Tarikh	Tempat	Masa
11 Jun - 7 Ogos 2011	Masjid Negeri Pulau Pinang, Masjid Daerah SPS & Masjid Seberang Jaya	<u>Sabtu</u> 2.00-6.00 petang <u>Ahad</u> 9.00-1.00 petang

Seminar Al-Quran

Seminar ini telah diadakan pada 2 Julai 2011 bertempat di Dewan Sri Pinang. Tema seminar ialah "Keindahan Al-Quran *Cerminan Masyarakat Islam*". Seminar ini membincangkan beberapa kertas kerja yang disampaikan oleh pakar dalam bidang masing-masing. Tajuk-tajuk kertas pembentangan dan penceramah:

- Khalifah Dari Perspektif Al-Quran, oleh Dr. Muhammad Nur Manuty
- Keadilan Sosial Dalam Islam, oleh Prof. Madya Datin Dr. Paizah binti Ismail
- Tamadun Insani, oleh Prof. Madya Dr. Wan Salim bin Wan Mohd. Nor
- Integriti Sosial, oleh Dr. Ahmad Bashir bin Aziz
- Ikatan Perhubungan Masyarakat, oleh Tuan Hj Zakaria bin Hj Ahmad

Program Masyarakat Mendekati Al-Quran

Program ini adalah berbentuk wacana ilmu bagi mendekatkan diri masyarakat kepada al-Quran di samping untuk membentuk *jilul Quran (generasi al-Quran)* yang cemerlang di dunia dan akhirat. Antara pengisian program ini ialah;

- Klinik Fatimah,
- Al-Quran Sebagai Hasonah (kebal)
- Hikmah & Fadhiilat Al-Quran,
- Wasiat Lugman Al-Hakim, dan
- Al-Quran Sebagai Syifa'.

Program bermula pada 11 Jun 2011 dan berakhir pada 23 Julai 2011 bertempat di Masjid-masjid Daerah Negeri Pulau Pinang.

Pembacaan Kitab

Program ini bertujuan memupuk minat masyarakat kepada pengajian al-Quran sekaligus ia memberi pendedahan mengenai pengertian al-Quran serta kaedah atau manhaj kandungan al-Quran yang merangkumi pelbagai ilmu dan aspek kehidupan manusia.

ILMU HITAM

Oleh: Azmah Abdullah, Bahagian Dakwah



Pengenalan

Ilmu hitam seringkali dikaitkan dengan alam ghaib dan perkara mistik seperti sihir, saka, pukau, santau, mantera, pemakaian susuk, jampi, kersukan syaitan, gangguan jin dan makhluk halus. Mutakhir ini banyak penayangan filem, drama dan rencana di televisyen berkaitan ilmu hitam seperti Expose Mistik, Misteri Nusantara, Waris Jari Hantu, Niyang Rapih dan lain-lain. Semua ini banyak memberi input dan maklumat berkaitan ilmu hitam. Namun, sejauhmanakah kesedaran masyarakat tentang ilmu hitam? Fokus ruangan aqidah pada kali ini ialah mengenai ilmu hitam iaitu 'Sihir'.

Pengertian Sihir

Menurut Ibnu Qudamah al-Maqdisi, sihir ialah ikatan, jampi dan perkataan yang diucapkan atau ditulis atau dibuat sesuatu yang mendatangkan kesan dan akibat terhadap tubuh, hati dan akal orang yang disihir tanpa menyentuhnya secara langsung.

Sheikh Wahid Abdul Salam al-Baly dalam kitabnya "*Wiqayah al-Insan Min al-Jin wa al-Syaitan*" (Perisai Manusia daripada Jin dan Syaitan) menjelaskan bahawa sihir ialah hasil kesepakatan di antara penyihir dan syaitan. Biasanya syaitan akan berjanji kepada tukang sihir bahawa penyihir mesti melakukan sebahagian perbuatan-perbuatan yang mengandungi unsur syirik sebagai imbalan bantuan dan taat setia untuk menyampaikan apa yang berkaitan dengan perkara-perkara yang diingini.

Ayat-ayat Berkaitan Sihir

Allah telah menjelaskan di dalam al-Quran bahawa terdapat sebanyak 67 ayat yang berkenaan dengan sihir. Antaranya ialah di dalam surah al-Baqarah ayat 102 yang bermaksud:

“ Mereka mengikut ajaran-ajaran sihir yang dibacakan oleh puak-puak syaitan dalam masa pemerintahan Nabi Sulaiman, padahal Nabi Sulaiman tidak mengamalkan sihir yang menyebabkan kekufuran itu, akan tetapi puak-puak syaitan itulah yang kafir kerana merekalah yang mengajarkan manusia ilmu sihir ...”

Hukum Belajar Dan Beramal Dengan Sihir

Para ulama termasuk Imam Nawawi di dalam Syarah Muslim telah bersepakat bahawa hukum mempelajari dan mengamalkan sihir adalah haram. Perkara ini dijelaskan oleh Allah SWT dalam al-Quran surah al-Baqarah ayat 102 menjelaskan, ilmu sihir tidak memberikan sebarang kegunaan dan manfaat kepada manusia. Ia hanya mengundang kemudaratannya yang amat besar bahkan membawa kepada perbuatan syirik dan menyekutukan Allah SWT.



Jenis-Jenis Sihir

Terdapat pelbagai jenis sihir seperti sihir pemisah, percintaan, pembenci, pelaris, pukau, santau, susuk dan lain-lain.

Contoh-Contoh Gangguan Sihir

- Dada terasa bagaikan ditindih sesuatu ketika berbaring,
- Selalu gelisah waktu tidur,
- Perubahan emosi yang mendadak seperti marah dan takut yang bersangatan,
- Sering mengalami mimpi menakutkan, dan
- Mendengar suara yang aneh.

Amalan Menangkis Perbuatan Sihir

Selain melaksanakan perintah Allah seperti sembahyang, puasa, zakat, menjauhi maksiat dan tidak makan atau minum benda-benda yang haram, Rasulullah SAW juga menganjurkan umatnya agar membaca ayat-ayat al-Quran seperti surah al-Ikhlâs, al-Falaq, an-Nas, ayat Kursi dan doa-doa khusus sebagai benteng pertahanan diri.

* Bacaan doa bagi mengelakkan perbuatan sihir :

بِسْمِ اللَّهِ الَّذِي لَا يَضُرُّ مَعَ اسْمِهِ شَيْءٌ فِي الْأَرْضِ وَلَا فِي السَّمَاءِ وَهُوَ السَّمِيعُ الْعَلِيمُ.

Ertinya : “ Dengan nama Allah yang tiada siapa mampu memudaratkan dengan namaNya sama ada di bumi mahupun di langit, dan Dialah Maha Mendengar lagi Maha Mengetahui. ”

Doa ini dipetik daripada Hadis Rasulullah SAW yang diriwayatkan oleh Abu Daud dan Tirmidzi.



MUSAHAQAH

Oleh : Mohd Lukmanul Hakim Mokhtar, Bahagian Pendidikan

Musahaqah berasal daripada perkataan Sahaqa. Dari segi bahasa membawa maksud gosok. Menurut Abdul Qadir Audah dalam kitabnya At-Tasyri'e Al-Jina'ie sihaq bermaksud gosok dan gesel.

Dari segi istilah syarak ialah melakukan sesuatu perbuatan untuk memuaskan nafsu seks di antara perempuan dengan perempuan, iaitu perbuatan menggeselkan kemaluan dengan kemaluan hingga mendatangkan berahi dan merasai kelazatan. Dalam konteks pada hari ini dikenali sebagai lesbian.

Dalil Pengharaman Musahaqah

Allah SWT berfirman dalam surah al-Mu'minin ayat 5 - 7 yang maksudnya:

"Dan orang-orang yang menjaga kemaluan mereka, kecuali terhadap isteri mereka ataupun orang yang mereka miliki (hasil dari peperangan dengan orang kafir), maka sesungguhnya mereka dalam keadaan ini tidak tercela. Sesiapa yang mencari yang sebalik dari itu (melalui jalan zina, homoseksual dan sebagainya) maka mereka itulah orang-orang yang melampaui batas."

Hadis riwayat Imam al-Baihaqi daripada Abi Musa al-Asy'ari RA, Rasulullah SAW bersabda yang bermaksud : "Apabila seorang lelaki mendatangi lelaki (liwat) maka mereka berdua berbuat zina, dan apabila seorang wanita mendatangi wanita (musahaqah) maka mereka berdua berbuat zina".

Dalam Majallat Buhus Islamiyah Arab Saudi menyatakan bahawa musahaqah adalah perbuatan yang haram antara perempuan dengan perempuan sama seperti yang dilakukan oleh lelaki.

Dr. Wahbah az-Zuhaili dalam kitabnya Fiqhul Islami Wa Adillatuhu, menyebut bahawa perhubungan antara perempuan dan perempuan adalah haram dan dikenakan hukuman takzir bagi pelaku perbuatan ini.

Punca Berlaku Musahaqah

- Kurangnya penghayatan agama dalam kehidupan,
- Terpengaruh dengan takan serta budaya liar.
- Membaca atau menonton bahan lucah, akhirnya melahirkan perasaan ingin mencuba lalu terjermus,
- Pengalaman hitam ketika usia kanak-kanak memupuk kecenderungan kasih kepada perempuan, seperti melihat lelaki atau saudara yang disifatkan sebagai ganas, juga mempunyai bapa yang tidak bertanggungjawab, kaki pukul dan sebagainya,
- Tidak mahu memikul tanggungjawab dan komitmen selaku isteri,
- Mempunyai pengalaman yang menakutkan bersama suami,
- Suka berpasangan sesama wanita kerana tiada risiko mengandung, dan
- Menganggap pasangan wanita lebih memahami

Hukuman Ke Atas Pelaku Musahaqah

Beberapa pendapat ulama mengenai Musahaqah:

Hanafiyah : Wajib dihukum bagi kedua-dua pelaku sihaq daripada wanita dengan seratus kali sebatan.

Zahiriyyah : Tiada hukuman secara mutlak, tiada had dan tiada takzir keatasnya.

Jumhur Ulama : Hukuman takzir dikenakan ke atas perbuatan haram dan tidak dikenakan hukuman had.

Menurut Enakmen Kesalahan Jenayah Syariah (Negeri Pulau Pinang) 1996, Seksyen 26 memperuntukkan, "Mana-mana orang perempuan yang melakukan musahaqah adalah melakukan suatu kesalahan dan apabila disabitkan boleh didenda tidak melebihi RM5,000 atau dipenjarakan selama tempoh tidak melebihi tiga tahun atau disebat tidak melebihi enam sebatan atau dihukum dengan mana-mana kombinasi hukuman itu."

Pelaku musahaqah yang berpelukan atau berciuman sesama wanita di tempat awam juga boleh dibendung dengan tindakan undang-undang. Menurut Seksyen 29 enakmen sama, diperuntukkan, "Mana-mana orang yang bertindak atau berkelakuan tidak sopan bertentangan dengan Hukum Syarak di mana-mana tempat awam adalah melakukan suatu kesalahan dan apabila disabitkan boleh didenda tidak melebihi RM1,000 atau dipenjarakan tidak melebihi enam bulan atau kedua-duanya."

Pihak yang menganjurkan aktiviti dengan tujuan menganjurkan, mendorong atau menggalakkan aktiviti maksiat juga boleh dikenakan tindakan undang-undang. Pengendali laman maya yang dikatakan memudahkan golongan musahaqah mencari kenalan dan bertukar-tukar pasangan dalam tempoh singkat, dan kemudian membawa kepada aktiviti seperti parti seks lesbian boleh dikenakan tindakan menurut Seksyen 35 enakmen ini.

Seksyen ini memperuntukkan, "Mana-mana orang yang menganjurkan, mendorong atau menggalakkan orang lain melakukan apa-apa maksiat adalah melakukan suatu kesalahan dan apabila disabitkan boleh didenda tidak melebihi RM5,000 atau dipenjarakan selama tempoh tidak melebihi tiga tahun atau kedua-duanya."

Kesimpulan

Perlakuan musahaqah jika tidak dibendung akan meruntuhkan institusi perkahwinan kerana pelaku musahaqah tidak berminat dengan perkahwinan. Pelaku musahaqah juga terdedah dengan pelbagai penyakit fizikal dan mental serta akan mendapat balasan azab di dunia dan akhirat.

Gejala ini telah dirakamkan oleh Allah SWT dalam al-Quran, bagaimana diazab golongan yang ingkar terhadap Nabi Allah Lut dengan perbuatan mereka yang menyalaifi firah manusia. Mereka diterbalikkan oleh Allah SWT ke dalam bumi kerana sifat mereka yang suka kepada hubungan sejenis antara lelaki dengan lelaki serta perempuan dengan perempuan. Maka pengajaran ini haruslah diambil serta dijadikan iktibar bagi kita semua, apabila sesuatu perkara yang menjadi kemurkaan Allah SWT sudah pasti akan membawa kepada kehancuran dan kebinasaan.





QAZAF

Oleh : Muzafar Ikmal Saaid,
Bahagian Penguatkuasaan

Allah SWT telah mensyariatkan hukuman had qazaf bagi memelihara manusia daripada sewenang-wenangnya melemparkan tuduhan zina terhadap orang lain. Islam memelihara kemuliaan dan maruah manusia. Agama mengajar kita supaya tidak berburuk sangka dengan orang lain, menjaga lidah daripada menuduh seseorang dan memelihara kita daripada terjebak dalam menyebarkan fitnah.

Hukuman Had Qazaf

Dalam surah an-Nur ayat 4 Allah SWT berfirman yang bermaksud “Dan orang-orang yang melemparkan tuduhan (zina) kepada perempuan yang terpelihara kehormatannya, kemudian mereka tidak membawakan empat orang saksi, maka sebatilah mereka lapan puluh kali sebatan, dan janganlah kamu menerima persaksian mereka itu selama-lamanya, kerana mereka adalah orang-orang yang fasiq”. Imam Abdul Rahman Muhammad I'wad al-Juzairi di dalam kitabnya, *Kitab al-Fiqh 'ala al-Mazahib al-'Arba'ah*, jilid yang kelima di bawah bab *Had al-Qazaf* menyebutkan, hukuman terhadap mereka yang melakukan qazaf adalah seperti berikut:


- Disebat 80 kali sebatan mengikut cara Islam,
- Penyaksian/keterangannya ditolak sepanjang hayatnya,
- Dihukum menjadi ahli fasiq,
- Dianggap sebagai *kazib* (pendusta) di sisi Allah SWT,
- Dilaknat di dunia dan dilaknat di akhirat,
- Baginya azab yang pedih di akhirat, dan
- Anggota badannya akan menjadi saksi terhadap tuduhan yang telah dilemparkan pada hari akhirat kelak.

Balasan Terhadap Qazif (orang yang menuduh)

Dalam surah an-Nur ayat 23 - 25, Allah SWT berfirman yang bermaksud, “Sesungguhnya orang-orang yang menuduh perempuan-perempuan (dan lelaki-lelaki) yang terpelihara kehormatannya, yang tidak terlintas memikirkan sebarang kejahatan, lagi yang beriman, akan dilaknat (oleh Allah) di dunia dan di akhirat dan mereka pula akan beroleh azab siksa yang besar

Pada hari lidah mereka dan tangan mereka serta kaki mereka menjadi saksi terhadap mereka sendiri, tentang segala yang mereka lakukan”. Sebahagian para ulama menyebut, *qazif* (orang yang menuduh) dituntut mengemukakan empat orang saksi untuk membenarkan dakwaannya, sekiranya dia berbohong maka di akhirat kelak akan bangun lima anggota badannya yang akan menjadi saksi kepada pembongkangannya iaitu lidah, kedua-dua tangan dan kedua-dua kakinya. Ia adalah satu penghinaan kepadanya sesuai dengan percubaannya menuduh orang lain melakukan zina.

Penulis juga menyebut di dalam *Kitab al-Fiqh 'ala al-Mazahib al-'Arba'ah*, “Sesiapa yang membuka keaiban manusia, maka keaibannya juga akan dibuka oleh orang lain, dan sesiapa yang cuba mengintai-intai aurat (membuka keaiban) muslim yang lain, maka Allah SWT akan mengintai-intai auratnya (membuka keaibannya), sepertimana kamu berbuat sesuatu perkara (kejahatan), kamu akan dibalas dengan perkara itu (kejahatan), sesiapa yang menanam kerugian nescaya akan memperoleh penyesalan”. Oleh itu, sebagai seorang muslim, kita hendaklah menjaui daripada perkara yang akan merugikan kita di dunia dan di akhirat.



Definisi Qazaf

Menurut istilah syarak, qazaf ialah menuduh seseorang melakukan zina tanpa mengemukakan saksi-saksi yang adil. Ia juga termasuk jika menuduh seseorang itu melakukan liwat atau jika menafikan anak sebagai nasabnya. Kesemua imam mazhab iaitu Hanafi, Maliki, Syafie dan Hanbali telah bersepakat bahawa sesiapa yang menuduh seseorang melakukan zina atau liwat tanpa mengemukakan saksi-saksi, maka mereka yang menuduh itu wajib dijatuhkan hukuman had qazaf. Begitu juga kepada lelaki yang menafikan anaknya sebagai nasabnya tanpa bukti atau saksi-saksi.


Hikmah

Pengharaman Qazaf

Tujuan pengharaman qazaf adalah bagi memelihara maruah manusia, yang menjadi satu daripada perkara yang sangat penting bagi manusia sama ada bagi diri, keluarga atau masyarakatnya. Islam telah menegaskan kewajiban mempertahankan maruah dengan meletakkan maruah mengatasi harta yang juga wajib dipertahankan. Demi menjaga maruah itulah, maka diwajibkan hukuman qazaf secara hudud yang ditetapkan oleh Allah SWT dan Rasul-Nya SAW supaya seseorang itu atau kumpulan tidak boleh melemparkan tuduhan zina atau liwat ke atas seseorang yang lain secara sewenang-wenangnya.

Kesimpulan

Sebagai seorang muslim, kita diwajibkan akur dengan undang-undang yang telah ditetapkan Allah SWT kepada kita, sepertimana termaktub di dalam al-Quran dan as-Sunnah, kerana Allah SWT yang menjadikan manusia, maka Allah SWT jualah yang maha mengetahui undang-undang yang sesuai untuk manusia.



PAUTAN EXCO

Pengerusi Jawatankuasa Hal Ehwal Agama,
Perdagangan Dalam Negeri Dan
Hal Ehwal Pengguna

(Y.B. Tuan Haji Abdul Malik bin Abul Kassim)



KASIH IBU BAPA MEMBAWA KE SYURGA

"Kasih dan sayangnya ibu terhadap anak sukar digambarkan kerana perasaan ini adalah kurniaan Allah kepada seorang wanita yang bergelar ibu. Keperitan dan kesusahan yang dirasakan oleh ibu ketika mengandungan dan membesarkan anak juga tidak dapat dibayangkan sehingga seseorang itu sendiri menjadi ibu." Demikian kata Adun Batu Maung, Abdul Malik Kassim, ketika berucap pada majlis Forum Perdana sempena sambutan Hari Ibu di Padang Bolasepak Sungai Ara, Batu Maung, 16 Mei lalu.

Tambahnya penghormatan terhadap ibu perlu diutamakan berbanding hak kepada seorang bapa, berdasarkan hadis sahih yang diriwayatkan oleh Bukhari dan Muslim yang bermaksud: **"Ada seorang lelaki datang bertemu Rasulullah SAW, lalu bertanya: Wahai Rasulullah, siapakah orang yang paling berhak untuk aku hormati? Baginda menjawab: Ibumu. Lelaki itu kembali bertanya : Kemudian siapa? Nabi menjawab: Ibumu. Lelaki itu terus bertanya : Kemudian siapa? Nabi menjawab lagi : Ibumu. Sekali lagi lelaki itu bertanya: Kemudian siapa lagi? Nabi menjawab pula: Kemudian bapamu."**

Abdul Malik menjelaskan begitulah tingginya kedudukan seorang ibu pada pandangan Rasulullah.

"Betapa mulianya seorang ibu hinggakan Rasulullah SAW meletakkannya sebagai pihak ketiga yang perlu dihormati selepas Allah dan Rasulullah. Kita juga pernah mendengar kata-kata, syurga itu di bawah telapak kaki ibu. Begitu pentingnya kita menghormati ibu bagi mendapat keredaan Allah," katanya.

Sebab itu, tambahnya Islam menentang keras penganutnya menyakiti ibu bapa sendiri, sekalipun dengan perkataan...ah ! Apatah lagi, sekiranya ibu dan bapa dimaki-hamun atau disisihkan oleh anaknya sendiri.



"Allah berjanji bahawa setiap orang yang melakukan penderhakaan kepada ibu bapa akan diberi pembalasan setimpal dengan perbuatan mereka sama ada di dunia atau akhirat," jelasnya yang juga Pengerusi Jawatankuasa Hal Ehwal Agama.

Menurut Abdul Malik lagi dalam satu hadis lain, Rasulullah SAW pernah bersabda, keredaan Allah bergantung kepada keredaan kedua-dua ibu bapa. Ini bermakna jika ibu bapa suka kepada kita, Allah turut meredai kita. Sebaliknya, jika mereka marah dan berkecil hati kepada kita, Allah turut memurkai kita.

Justeru, katanya usaha kerajaan negeri Pulau Pinang dengan kerjasama JKKK KADUN Batu Maung dan Jabatan Hal Ehwal Agama Islam Pulau Pinang (JHEAIPP), menganjurkan forum bertajuk "Kasih Ibu Bapa Membawa Ke Syurga" adalah sebahagian kecil usaha dakwah bagi mendekatkan lagi umat Islam di negeri ini dengan agama suci itu.

Membariskan ahli panel daripada rancangan Semanis Kurma TV9, Ustaz Akasyah Abdul Hamid dan Datuk Siti Nur Bahyah Mahmood, berjaya mengetuk hati kecil kira-kira seribu hadirin, sehinggakan ada yang bergenang air mata kerana tersentuh dengan bicara pasangan suami isteri itu.

Turut hadir Pengarah JHEAIPP, Sazali Hussein dan Pegawai Daerah Darat Daya, Jusni Ismail dan menampilkan Ustaz Muhammad Imran Ibrahim dari JHEAIPP sebagai moderator pada malam itu.



BELANJA BERTHEMA BERI

Kejayaan sumbangan kali ke-2 Program Penghargaan Warga Emas (PPWE), dilaksanakan oleh kerajaan negeri pada 23 April lalu, membuktikan amalan berijmat cermat yang berjaya dilaksanakan telah memberi banyak manfaat kepada rakyat negeri ini. Exco Kerajaan Negeri, Abdul Malik Kassim berkata demikian kepada i-Fikrah ketika merayakan kira-kira 2,000 warga emas Batu Maung di Maybank i-Venue Bukit Jambul.

Beliau menambah, kejayaan itu diraih mampu memberi pulangan kepada lebih 114,000 warga emas yang berusia lebih 60 tahun atau kira-kira 85 peratus daripada keseluruhan warga emas Pulau Pinang mendapat wang penghargaan tersebut.

Walaupun sebelum ini, tambahnya ada pihak yang cemburu dan cuba untuk sabotaj pelaksanaan program PPWE dengan mendakwa wang yang disumbangkan adalah daripada sumber haram. Namun, kerajaan negeri masih meneruskan inisiatif ini demi kebaikan rakyat.

“Apa yang peliknya, walaupun sebelum ini ada dakwaan, tohmahan dan lemparan menafikan penerimaan wang tersebut oleh segelintir pihak, tetapi nama mereka tidak pula dipohon untuk dibatalkan sehingga ke hari ini.”

"Sekiranya mereka tidak memohon pembatalan nama daripada senarai yang mendaftar, maka mereka akan terus menerima sumbangan tersebut," tegasnya.




Sehingga kini, jelasnya lagi kerajaan negeri tidak menerima sebarang pembatalan nama warga emas yang telah memperoleh wang berkenaan sebelum ini. Malah, pihak-pihak berkenaan juga tidak dapat menghantar atau menyerahkan walau satu nama pun berhubung dakwaan mereka sebelum ini yang menyatakan bahawa terdapat segolongan warga emas ingin mengembalikan wang RM100.

Abdul Malik yang juga ADUN Batu Maung berkata, pada tahun 2010 bajet kerajaan negeri sebanyak RM500 juta telah diumumkan oleh PMW.

Sehubungan itu, katanya hasil penjiatan dan pelaksanaan berbelanja secara berhemah oleh kerajaan negeri, maka manfaat yang telah diterima oleh warga emas turut dikecapi oleh ibu tunggal dan orang kelainan upaya yang akan turut menerima sumbangan pada tahun ini.

Selain itu, sumbangan wang sebanyak RM1,000.00 juga diberikan kepada waris warga emas yang meninggal dunia.

Lensa **RIKRAH**



Sebahagian dif-dif jemputan
 Sebahagian dif-dif jemputan
 sedang menghayati bacaan peserta tilawah al-Quran
 di Dewan Sri Pinang



TYT Yang di-Pertua Negeri Pulau Pinang Tun Dato' Seri Utama
 (Dr) Haji Abdul Rahman Haji Abbas sedang menunggu keputusan
 tilawah yang diumumkan Pengerusi Jemaah Hakim



Johan Qari Encik
 Mohd Mawardi
 Jamaluddin
 mempertahankan johan
 tahun lepas dalam
 Majlis Tilawah Al-Quran
 Peringkat Negeri Pulau
 Pinang 2011



Johan Qari Encik Mawardi dan johan
 Qariah Puan Habsah bersama para
 hakim tilawah Majlis Tilawah Al-Quran
 Peringkat Negeri Pulau Pinang 2011.



TYT Yang di-Pertua
 Negeri Pulau Pinang
 sedang menyampaikan
 hadiah kepada Johan
 Qariah Puan Habsah
 Osman di Majlis Tilawah
 Al-Quran Peringkat
 Negeri 2011.



Sebahagian hadirin yang memenuhi Dewan Sri Pinang untuk bersama menghayati bacaan dan terjemahan
 ayat ayat al-Quran di Majlis Tilawah Al-Quran Peringkat Negeri Pulau Pinang kali ke-54 Tahun 2011

PUSAT FALAK SHEIKH TAHIR

Sumber Rujukan : Mufti.penang.gov.my/falak

Sejarah Awal

Perletakan batu asas bangunan Pusat Ilmu Falak telah dilancarkan pada bulan Jun 1988 (Syawal 1408) dan sekaligus merupakan sumbangan permulaan yang amat penting kepada cerapan dan eksperimen kegiatan ilmu falak di Malaysia dan di rantau ini.

Pusat Falak Syeikh Tahir dibuka dengan rasminya pada hari Rabu, 30 Rabiulawal 1412H bersamaan 9 Oktober 1991, bertujuan memenuhi keperluan saintifik dalam bidang kritikal seperti kalendar Islam, kajian senja, pemupusan dan pembiasan atmosfera, kenampakan anak bulan serta perkara-perkara yang berkaitan dengannya.

Penempatan

Pusat Falak Sheikh Tahir, Balik Pulau, terletak di Pantai Acheh kawasan paling barat negeri Pulau Pinang. Ia merupakan stesen penyelidikan astronomi dan sains atmosfera Jabatan Mufti Negeri Pulau Pinang dengan Unit Penyelidikan Ilmu Falak dan Sains Atmosfera, Universiti Sains Malaysia (USM).

Memorandum persefahaman di antara Universiti Sains Malaysia dengan Majlis Agama Islam Negeri Pulau Pinang (MAINPP) ditandatangani pada hari Rabu, 21 Oktober 1992 bersamaan 25 Rabiulakhir 1413H.



Pusat Falak ini akan ditadbirkan sepenuhnya oleh Jabatan Mufti Negeri Pulau Pinang. Manakala USM dan MAINPP bekerjasama dalam bidang pentadbiran, kewangan dan penyelidikan di Pusat Falak tersebut.

Matlamat Penubuhan

Selaras dengan persetujuan yang dicapai, satu lembaga penasihat telah ditubuhkan bertujuan merancang dan mengawasi pembangunan dan perkembangan masa depan Pusat Falak. Ia bertujuan untuk mengembangkannya sebagai sebuah pusat antarabangsa yang cemerlang.



Penubuhan ini adalah rentetan daripada kejayaan penemuan Garisan Tarikh Lunar Antarabangsa bersama dengan pembentukan suatu kaedah saintifik penentuan kenampakan anak bulan yang moden. Di samping kemajuan dalam penyelidikan lapisan ozon menjadikan kewujudan penyelidikan ilmu falak suatu yang mustahak.

Selain digunakan untuk observatori, Pusat Falak Sheikh Tahir juga dilengkapi dengan bahan-bahan pameran. Ia dapat memberi pengetahuan dan menimbulkan minat terhadap astronomi di kalangan masyarakat. Pada jangka masa panjang, Pusat Falak Sheikh Tahir diharap akan berupaya untuk menjadi pengetahuan dan menimbulkan minat terhadap astronomi di kalangan masyarakat. Begitu juga ia diharap akan berupaya untuk menjadi pusat penyelidikan, pendidikan dan pelancongan *Astro-Tourism*.



Kemudahan

- **Kubah Cerapan**
Terletak di bumbung bangunan berukuran 10 kaki persegi yang boleh memuatkan 15 orang dalam satu-satu

masa. Bukaan secara horizontal dan bergerak secara automatik dengan menurut perubahan teleskop penjejak.

- **Teleskop Penjejak,**
Memuatkan kemudahan 2 buah teleskop penjejak. Satu daripadanya teleskop jenis Meade LX200 12 inch (klasik) yang terletak di dalam kubah cerapan. Manakala satu lagi daripada jenis Meade LX200 10 inch (GPS). Kedua-duanya beroperasi secara automatik. Di samping itu, terdapat beberapa buah teleskop lain bersaiz kecil yang digunakan untuk tujuan cerapan.

- **Galeri Pameran as-Sijzi**

Ruang pameran tersedia di pintu masuk Balai Cerap Pusat Falak Sheikh Tahir. Memaparkan sejarah falak Pulau Pinang dengan rangkuman sejarah 2

tokoh falak iaitu Sheikh Tahir Jalaluddin dan Sheikh Abdullah Fahim. Selain itu, pelbagai maklumat berkenaan astronomi tersedia untuk rujukan dengan mendapat tunjuk ajar daripada para pegawai yang bertauliah.

- **Dewan Syarahan Ulugh Begh**
Dewan yang boleh menempatkan lebih kurang 50 orang dalam satu-satu masa. Mempunyai kemudahan yang lengkap, selesa dan sesuai bagi menjalankan sebarang aktiviti bengkel, kursus dan ceramah.

- **Penginapan**

Kemudahan penginapan disediakan kepada para penyelidik secara percuma, lengkap dengan katil, almari, penghawa dingin, kipas angin, bilik mandi, tandas, ruang tamu, pantri dan peti sejuk.



REZEKI HALAL, KELUARGA BERKAT

Oleh : Siti Suhaila Arsad, Bahagian Undang-Undang Keluarga Islam

Semakin hari tingkah laku anak remaja semakin tidak terkawal, anak seusia 12 tahun sudah pandai menengking ibu bapa, isteri tidak menghormati suami, suami pula mencari orang ketiga sebagai tempat memuaskan nafsu. Di manakah hilangnya kebahagiaan dalam sebuah keluarga? Adakah disebabkan tiadanya keberkatan?

Mari kita merenung bersama. Mungkinkah ia berpunca daripada sumber rezeki yang diberikan kepada seluruh ahli keluarga?

Firman Allah SWT dalam surah Yunus, ayat 59 yang bermaksud: *"Katakanlah (Muhammad), Terangkanlah kepadaku tentang rezeki yang diturunkan Allah SWT kepadamu, lalu kamu jadikan sebahagiannya haram dan sebahagiannya halal."* Katakanlah, Apakah Allah SWT telah memberikan izin kepadamu (tentang ini), ataulah kamu mengada-ada atas nama Allah SWT?

Halal itu bukan pada zahirnya sahaja seperti makanan dan minuman yang halal. Perkara yang lebih penting adalah punca dan sumber untuk mendapatkan makanan tersebut juga mestilah daripada cara yang halal. Islam melarang mendapatkan rezeki dengan cara menipu, rasuah, pecah amanah, berjudi dan lain-lain sumber yang haram. Agama menuntut kita untuk mencari rezeki dari sumber yang dikehendaki mengikut hukum syarak kerana ia turut mempengaruhi kehidupan keluarga.

Sabda Nabi Muhammad SAW yang bermaksud: *"Sesiapa bekerja untuk anak isterinya melalui jalan yang halal, maka bagi mereka pahala seperti orang yang berjihad di jalan Allah SWT."* (Hadis Riwayat al- Bukhari)

Oleh itu, setiap ibu bapa perlu memastikan setiap rezeki yang dibelanjakan kepada keluarga adalah daripada sumber yang halal serta menjauhi perkara syubhah, apatah lagi daripada yang haram. Rezeki halal bukan sahaja membawa keberkatan malah ia juga dapat melahirkan zuriat yang pintar, sihat dan taat kepada ibu bapa. Di samping itu, ia juga mendorong seseorang ke arah melakukan kebaikan di dunia serta mendapat rahmat Allah SWT di akhirat. Allah SWT berfirman dalam surah al-Baqarah, ayat 168 yang bermaksud:

"Wahai manusia! Makanlah dari (makanan) yang halal dan baik yang terdapat di bumi, dan janganlah kamu mengikuti langkah-langkah syaitan. Sungguh, syaitan itu musuh yang nyata bagimu."

Kesimpulannya, carilah rezeki yang halal kerana yang halal adalah tuntutan agama. Rezeki halal, keluarga berkat!



∞ Hikmah Di Sebalik Mencari Rezeki Yang Halal ∞

Doa Dimakbulkan

Salah satu punca termakbulnya doa adalah rezeki yang halal.

Doa yang dimakbulkan membawa kepada kebahagiaan dan keharmonian sesebuah keluarga.

Hadis Nabi Muhammad SAW yang bermaksud :

Dari Ibn Umar RA katanya :

"Sesiapa yang membeli pakaian dengan harga 10 dirham, 1 dirham di antaranya wang yang haram, maka Allah Taala tidak akan menerima solatnya selama pakainya itu masih dipakainya. Kemudian Ibn Umar memasukkan kedua jarinya ke dalam 2 telinganya, lalu berkata : Biarkanlah telinga ini tuli kalau tidak mahu mendengar kata-kata dari Nabi SAW ini."

(Hadis Riwayat al-Bukhari)

Dijauhkan Daripada Api Neraka

Rezeki yang berkat itu juga menjauhkan seseorang itu daripada api neraka sebagaimana sabda Nabi SAW yang bermaksud:

"Setiap daging yang tumbuh daripada makanan yang haram, maka api neraka lah lebih utama untuk dirinya."

(Hadis Riwayat al-Hakim)

Khalifah Umar Abdul Aziz memiliki wibawa peribadi dan tekad politik atau *political will* yang cukup kuat. Baginda mampu menegakkan semula prinsip keadilan yang telah lama menghilang bersama hilangnya politik berprinsip dan bermoral. Memang tidak mudah melaksanakan langkah-langkah korektif apalagi ia melibatkan kepentingan keluarga dan kerabatnya sendiri. Baginda sanggup menjadi tidak popular di kalangan warga Bani Umayyah demi prinsip keadilan dalam erti mengembalikan hak kepada yang berhak, dan menarik balik hak mereka yang mengambilnya secara tidak hak.

Contoh kezamaman dan tekad Khalifah Umar Abdul Aziz inilah yang cuba dihadap oleh Ketua Menteri Pulau Pinang, Lim Guan Eng. Kisah-kisah ini beliau hayati melalui pembacaan sewaktu ditahan di bawah Akta ISA dan kerana 'kesalahan' membela seorang gadis Melayu yang terbabit dalam skandal bekas Ketua Menteri Melaka suatu ketika dulu.

Sebaik mengetahui kerajaan Pulau Pinang pada Mac 2008, beliau memperkenalkan beberapa pembaharuan untuk mengembalikan hak rakyat. Antara pembaharuan yang diperkenalkan adalah mengembalikan hak kontraktor Melayu yang terpinggir kerana amalan agihan projek melalui kroni pihak tertentu sebelum ini.

Sistem Tender Terbuka

Sistem tender terbuka yang diperkenalkan menimbulkan kecaman pelbagai pihak. Terdapat kecaman berbau perkauman mendakwa kerajaan negeri berhasrat menghapuskan hak Melayu. Golongan tersebut mendakwa, melalui sistem tender terbuka akan meminggirkan kontraktor Melayu Islam. Telah tertanam dalam pemikiran mereka, kontraktor Melayu tidak mampu bersaing dengan kontraktor bangsa lain.

Hakikatnya, di bawah pentadbiran urustadbir Cekap, Akauntabiliti dan Telus (CAT) yang menjadi asas pentadbiran kerajaan negeri telah membuktikan sebaliknya. Sistem tender terbuka membuktikan kemampuan kontraktor Melayu apabila memenangi 100% daripada nilai projek Jabatan Parit dan Saliran (JPS) dan 98% daripada nilai projek Jabatan Kerja Raya (JKR) yang dibiayai sepenuhnya oleh kerajaan negeri.

Berikut disertakan fakta berkaitan :

Tender Yang Telah Diluluskan Oleh Jawatankuasa Tender JPS Bagi Tahun 2008 – 2010

	Kontraktor Melayu	Kontraktor Bukan Melayu	Jumlah
JUMLAH (RM)	40,944,933.80	0	40,944,933.80
% Dari Segi Nilai	100%	0	100%
Jumlah Bilangan	18	0	18
Jumlah Bilangan%	100%	0	100%

Tender Yang Diluluskan Oleh Jawatankuasa Tender JKR Bagi Tahun 2008 sehingga November 2010


	Kontraktor Melayu	Kontraktor Bukan Melayu	Jumlah
JUMLAH (RM)	20,407,640.94	407,000.00	20,814,640.94
% Dari Segi Nilai	98%	2%	100%
Jumlah Bilangan	16	1	17
Jumlah Bilangan%	94%	6%	100%

Hasil Tender Terbuka Perbadanan Bekalan Air (PBAPP) 2009


Kontraktor Bumiputera : 44 (67%) RM67,837,302.54

Kontraktor Bukan Bumiputera : 22 (33%) RM45,335,093.50

Bilangan Kontraktor Perolehan Bekalan/Perkhidmatan/Kerja Bertaraf Bumiputera/Bukan Bumiputera Bagi Tahun 2008 MPPP



Bilangan Kontraktor Perolehan Bekalan/Perkhidmatan/Kerja Bertaraf Bumiputera/Bukan Bumiputera Bagi Tahun 2009 MPPP



Ekoran daripada itu, pihak-pihak yang mengancam kerajaan negeri sebelum itu, iaitu Persatuan Kontraktor Melayu Malaysia Cawangan Pulau Pinang, telah memohon maaf melalui surat bertarikh 7 Januari 2011. Mereka kemudiannya mengadakan pertemuan dengan Ketua Menteri dan memohon maaf secara terbuka dengan bersaksikan para wartawan. Jalinan kerjasama antara kedua-dua pihak dipereratkan.

Tanpa tekad politik atau *political will* yang kuat sebagaimana yang ditunjukkan oleh Khalifah Umar Abdul Aziz, tidak mungkin sebarang pembaharuan oleh kerajaan negeri untuk kepentingan rakyat dapat dilaksanakan.



Adil mengandung pengertian yang sangat luas meliputi segala aspek kehidupan manusia. Dapatlah dirumuskan bahawa adil ialah memberikan hak kepada yang berhak dan menafikan hak kepada yang tidak berhak mengikut syariat Islam. Di dalam surah al-Maidah, ayat 8, Allah SWT berfirman yang bermaksud:

"Wahai orang-orang yang beriman, hendaklah kamu semua sentiasa menjadi orang-orang yang menegakkan keadilan kerana Allah, lagi menerangkan kebenaran; dan jangan sekali-kali kebencian kamu terhadap sesuatu kaum itu mendorong kamu kepada tidak melakukan keadilan. Hendaklah kamu berlaku adil (kepada sesiapa jua) kerana sikap adil itu lebih hampir kepada taqwa. Dan bertaqwalah kepada Allah, sesungguhnya Allah Maha Mengetahui dengan mendalam akan apa yang kamu lakukan."

Secara jelasnya, Allah SWT menyuruh dan menyarankan kita supaya berlaku adil semata-mata kerana-Nya dan melarang kita daripada bersifat diskriminasi atau berat sebelah terhadap sesama insan. Sesungguhnya sifat adil itu adalah hampir kepada sifat-sifat orang yang bertaqwa kepada Allah SWT.

Menyedari betapa pentingnya sifat adil tersebut, umat Islam dituntut untuk sentiasa mengamalkannya di dalam kehidupan seharian mereka yang telah ditetapkan oleh syariat Islam.

Konsep Adil

Konsep adil mestilah berpandukan kepada syariat dan sunnatullah. Panduan inilah yang menjadi akar umbi kepada tertegaknya keadilan kepada seluruh alam, sama ada manusia, haiwan, tumbuh-tumbuhan, malah cakerawala seluruhnya.

Rasulullah SAW melarang kita melakukan kezaliman sesama insan. Sekiranya kita melihat kezaliman berlaku, maka hendaklah kita menghentikannya kerana melihat sahaja tanpa berbuat apa-apa akan dikira sebagai bersubahat.

Keindahan sifat adil hanya akan dapat dinikmati sekiranya kita benar-benar mengamal, memberi dan menerimanya. Di antara ciri-ciri keadilan ialah:

- Mengutamakan ibadah kita hanya kepada Allah SWT,
- Melaksanakan ajaran yang dibawa Rasulullah SAW secara amanah,

- Memberi nafkah yang diperlukan ahli keluarga kita, dan
- Sentiasa menghormati diri sendiri, keluarga, jiran tetangga dan masyarakat sekeliling.

Kesan Melakukan Keadilan

Kita sering ditanya, apa yang akan diperolehi sekiranya kita berlaku dengan bersifat adil. Kesan daripada melakukan sifat adil ialah;

- Mendapat keredaan Allah SWT,
- Menjauhkan diri daripada azab Allah SWT,
- Mewujudkan keharmonian institusi keluarga, jiran tetangga, masyarakat dan negara.
- Menjadi ahli syurga Allah SWT.



KHIDMAT **mesra**

PROSEDUR PERMOHONAN SOKONGAN PAS LAWATAN IKHTISAS BELAJAR ATAU MENGAJAR AGAMA WARGANEGARA ASING

Oleh: Bahagian Pendidikan



Panduan ini disediakan bagi menjelaskan peraturan dan prosedur yang telah ditetapkan oleh pihak berkuasa agama di Malaysia berkaitan dengan sokongan pas lawatan ikhtisas belajar atau mengajar agama bagi warganegara asing.

Definisi

Pelajar atau guru asing ialah mereka yang datang ke negara ini sebagai pelajar atau guru dalam bidang agama Islam sahaja sama ada di sekolah atau institusi pengajian, badan berkanun, pertubuhan bukan kerajaan atau swasta yang berdaftar dengan kerajaan atau Jabatan atau Majlis Agama Islam Negeri.

Prosedur Permohonan

Setiap pemohon perlu mengisi borang mengikut kategori permohonan sebanyak tiga (3) salinan yang boleh diperolehi di Bahagian Pendidikan Jabatan Hal Ehwal Agama Islam Pulau Pinang.

Kategori permohonan :-

- Borang kuning bagi pelajar 18 tahun ke bawah,
- Borang hijau bagi pelajar 18 tahun ke atas, dan
- Borang biru bagi guru.

Dokumen-dokumen yang perlu disertakan ialah :

- Sijil Kelahiran,
- 3 keping gambar berukuran pasport,
- Salinan Pasport antarabangsa,
- Surat perakuan daripada sekolah atau institusi pengajian berkaitan,
- Salinan sijil kelulusan atau pendidikan tertinggi yang disahkan,
- Salinan sijil-sijil dan dokumen lain yang disahkan untuk menyokong permohonan,
- Laporan kemajuan pengajian atau pengajaran pemohon yang disediakan oleh sekolah (bagi permohonan lanjutan),
- Salinan rekod kehadiran sekolah dalam tempoh enam (6) bulan terakhir,
- Borang yang telah diisi hendaklah dikemukakan semasa sesi temuduga dan pengesahan kehadiran hendaklah dibuat sekurang-kurangnya satu (1) minggu sebelum temuduga,
- Borang permohonan yang tidak lengkap tidak akan diproses, dan
- Setiap pemohon dikehendaki menghadiri sesi temuduga untuk tapisan kelayakan yang diadakan di Jabatan Hal Ehwal Agama Islam Pulau Pinang.

Syarat-Syarat Dan Peraturan

- Tempat belajar atau mengajar hendaklah di Institusi Pengajian Agama yang berdaftar dengan kerajaan atau Jabatan atau Majlis Agama Islam Negeri Pulau Pinang,
- Jadual pengajian agama mestilah berbentuk harian dan sepenuh masa iaitu sekurang-kurangnya lima (5) jam sehari berada di premis tempat belajar atau mengajar,
- Kelas-kelas agama secara sambilan atau program hujung minggu tidak akan diberi kelulusan,
- Mempunyai penganjur (bertanggungjawab sepenuhnya di atas perakuan bertulis atau lisan yang dibuat pemohon serta bertanggungjawab atas apa-apa kos, menganjur, mengurus dan apa-apa kerugian yang timbul dari pemohon atas perlanggaran syarat),
- Lulus temuduga yang telah ditetapkan oleh Jabatan Hal Ehwal Agama Islam Pulau Pinang (bagi guru : temuduga dianjurkan oleh JAKIM),
- Menunjukkan prestasi yang baik dalam pengajian dan pengajaran,
- Tidak terlibat dengan aktiviti perniagaan dan pekerjaan secara sepenuh masa atau sambilan,
- Berakhlak baik dan tidak mempunyai sebarang rekod jenayah di Malaysia atau di negara asal, dan
- Patuh kepada undang-undang, peraturan-peraturan dan syarat-syarat ditetapkan oleh Jabatan Imigresen Malaysia atau mana-mana jabatan, agensi dan pihak berkuasa yang lain di Malaysia.



Kerana Nak Cantik,

Dosa Dianggap Biasa

Soalan?

Ramai di kalangan wanita hari ini yang memakai rambut palsu dan juga menyambung rambut demi kerana ingin cantik dan kononnya menjadi trend semasa. Apakah hukumnya jika orang Islam berbuat demikian?

Jawapan:


Terdapat beberapa nas yang melarang orang Islam terutamanya wanita daripada melakukan perbuatan tersebut. Antaranya ialah hadis Rasulullah SAW yang bermaksud : *"Daripada Ibnu Umar RA katanya; Rasulullah SAW melaknat orang yang membuat dan memakaikan orang rambut palsu, orang yang memakai rambut palsu, orang yang membuat tatu kepada orang lain (mencatatkan atau melukis dirinya agar cantik) dan orang meminta dirinya ditatu"* (Hadis Riwayat Imam Bukhari).

Hadis yang lain juga menyebut maksudnya : *"Daripada Fatimah bt al-Munzir, katanya; Aku mendengar Asma' berkata : Seorang wanita bertanya Rasulullah SAW katanya: Wahai Rasulullah, anakku terkena penyakit kulit di kepala yang menyebabkan rambutnya gugur, aku ingin mengahwinkan dia, apakah boleh aku pakaikan dia rambut palsu? Rasulullah SAW menjawab: Allah melaknat orang menyambung rambutnya dan orang yang meminta disambungkan rambutnya (berambut palsu)."* (Hadis Riwayat Imam Bukhari)

Kedua-dua maksud hadis di atas, jelas menunjukkan bahawa umat Islam, lelaki atau wanita adalah dilarang memakai rambut palsu, membuat rambut palsu untuk orang lain, menyambung rambut dan apa juga perkara yang berkaitan dengannya.

DIARI JHEAIPP

PROGRAM	TARIKH	TEMPAT
Majlis Pelancaran Sambutan Bulan-Bulan Al-Quran Negeri Pulau Pinang Tahun 2011	2 Jun 2011	Masjid Negeri Pulau Pinang
Program Masyarakat Mendekati Al-Quran	11 Jun – 23 Julai 2011	Masjid-Masjid Daerah
Kursus Bahasa Al-Quran (Bahasa Arab)	11 Jun – 7 Ogos 2011	Masjid Negeri Pulau Pinang, Masjid Daerah SPS & Masjid Seberang Jaya
Hafazan dan Talaqi Al-Quran	12 Jun – 14 Ogos 2011	Masjid Negeri Pulau Pinang
Wacana Ilmu dan Percambahan Minda	21 Jun 2011	Masjid Negeri Pulau Pinang
Kursus Pelapis Penolong Pendaftar NCR Pulau Pinang	24 – 26 Jun 2011	Hotel Swiss Inn Sg. Petani
Kem Jati Diri Saudara Kita	24 – 26 Jun 2011	Damai Park Resort, Merbok Kedah
Program Ibadah & Intergrasi Saudara Kita	1 - 3 Julai 2011	The Regency Jerai Hill Resort, Kedah
Seminar Al-Quran Peringkat Negeri Pulau Pinang	2 Julai 2011	Dewan Sri Pinang, Lebuhr Light
Bacaan Kitab "Al-Wasatiyyah Al-Islamiyyah" - Dr Yusuf Al-Qaradhawi	21 Julai 2011	Auditorium MPSP, Bandar Perdana
Program Di Ambang Ramadan (Saudara Kita)	23 - 24 Julai 2011	Darul Hanan Pulau Pinang
Bacaan Kitab "Mukhtasar Itqan Fi 'Ulum Al-Quran" - Imam Suyuti	13 – 14 Ogos 2011	Masjid Negeri Pulau Pinang
Majlis Penutupan Sambutan Bulan-Bulan Al-Quran Negeri Pulau Pinang Tahun 2011	14 Ogos 2011	Masjid Negeri Pulau Pinang



جانب حال احوال انكار اسلام و فلاح

فكره FIKRAH

JABATAN HAL EHWAL AGAMA ISLAM PULAU PINANG
No. Tel: 04-263 7200, Faks: 04-250 2810, Laman Web: <http://jaipp.penang.gov.my>

Keluaran ke-6, Tahun ke-3 (2011)

Sambutan Bulan-Bulan Al-Quran



Ilmu Hitam

**Kerana Nak Cantik,
Dosa Dianggap Biasa**

Musahhaqah

ISSN 2180-1118



ercuma

PENAUANG

Y.B TUAN HJ. ABDUL MALIK BIN ABUL KASSIM
EXCO HAL EHWAL AGAMA
PERDAGANGAN DALAM NEGERI
& HAL EHWAL PENGGUNA

PENASIHAT

TUAN HAJI SAZALI HAJI HUSSEIN
PENGARAH JHEAIPP

KETUA EDITOR

MARIAH ISMAIL
KETUA PENOLONG PENGARAH
BAHAGIAN DAKWAH, JHEAIPP

EDITOR

Mohd Amin Ismail

SIDANG PENGARANG

Anuar Hakim Mohd Salleh

Muhamad Sayuti Omar

Muzafar Ikmal Saaid

Mohd Saifullah Hamzah

Mohd Lukmanul Hakim Mokhtar

Zulkifli Mohamed

Nor Liza Mohamed

Azmah Abdullah

Siti Suhaila Arsad

Maznah Yusof

Azlina Mohd Dzuki

Siti Mariam Othman

JURUFOTO

Aziz Md Zain

Haji Saidin Haji Ahmad [Sambilan]

EDARAN

Zubir Jaafar

Siti Khodijah Yusof

Mohd. Zahri Zakaria

Mohd. Ashraf Ishak

Sebarang pendapat dan idea,
sila salurkan melalui:

Ifikrah_editor@yahoo.com.my

AL-QURAN PENCETUS INOVASI

Menyikap sejarah tamadun Islam khususnya sekitar abad ke 8 hingga ke abad 13, kita amat berbangsa sekali kerana terdapat ramai ilmuwan Islam yang hebat seperti al-Biruni, al-Khawarizmi, al-Idrisi, al-Kindi, Ibnu Sina, Ibnu Khaldun, al-Razi, al-Farabi, al-Ghazali, al-Jazari dan lain-lain lagi. Mereka telah mengemukakan penemuan-penemuan baru dan membina asas tamadun moden seperti dalam bidang perubatan, seni bina, pemetaan dunia, astronomi, geologi dan sebagainya. Tokoh-tokoh hebat ini mempunyai kreativiti dan inovasi dalam membina tamadun umat Islam ketika itu. Kreativiti dan inovasi yang dihasilkan merupakan natijah daripada hasil mengkaji al-Quran dan as-Sunnah. Ini membuktikan bahawa kreativiti dan inovasi tidak bercanggah dengan pandangan hidup Islam.

Hakikatnya, keperluan kreativiti dan inovasi tidak disebut secara langsung di dalam al-Quran dan as-Sunnah tetapi ianya boleh dilihat daripada sifat Allah Yang Maha Pencipta sebagaimana maksud ayat al-Quran, surah Yaasin, ayat 81, "...dan Dialah Pencipta yang tidak ada bandingannya, lagi yang Maha Mengetahui."

Dalam masa yang sama, banyak ayat al-Quran yang menggalakkan umat Islam berfikir, melihat dan memerhati kejadian alam serta mengambil pengajaran daripadanya. Antaranya ialah surah al-Baqarah 2:219, surah al-An'aam 6:151 dan surah Ali Imran 3:191. Berfikir, melihat dan memerhati ini adalah sebahagian daripada unsur-unsur kreativiti dan inovasi. Berkreativiti dan berinovasi juga sejajar dengan tuntutan al-Quran agar kita sentiasa memperbaiki diri menjadi lebih baik dan sentiasa berbuat kebaikan sesama manusia.

Justeru, kita sebagai umat yang diamanahkan untuk memakmurkan bumi ini, sewajarnya kita menghayati tuntutan berkreaitif dan berinovatif kerana ia tidak sesekali bertentangan dalam kerangka pemikiran Islam dengan syarat memenuhi syariat Islam. Maka, jadiklanlah al-Quran sebagai ilmu dan inovasi dalam pelbagai bidang. Ilmu akan melahirkan masyarakat yang berkemahiran tinggi dalam membangun tamadun bangsa.

Oleh sebab itu mencari ilmu pengetahuan bagi membangun tamadun umat yang inovatif amat dituntut oleh Islam. Selari dengan itu, pelbagai program ilmu dirancang dan dilaksanakan sempena dengan Sambutan Bulan-Bulan Al-Quran.

Salam hormat

Mariah Ismail

**MUTIARA KATA
IMAM SYAFIE :**

" Pilihlah makanan yang halal kerana ia menjamin kesihatan dan menyebabkan syaitan gerun."

Kandungan

Sidang Redaksi / Laman Ketua Editor / Mutiara Kata: Imam Syafie

Fokus : Sambutan Bulan-Bulan Al-Quran

Aqidah: Ilmu Hitam

Sosial: Musahaqah

Undang-undang: Qazaf

Pautan Exco: Kasih Ibu Bapa Membawa Ke Syurga
Belanja Berhemah Beri Pulangan Berganda

Lenca I-Fikrah

Institusi Madani: Pusat Falak Sheikh Tahir

Rumahku Syurgaku: Rezeki Halal, Keluarga Berkat

Jejak Mithali: Tender Terbuka Martabatkan Maruah Kontraktor Melayu Islam

Ringkasan Khutbah Pilihan: Indahny Sifat Adil

Khidmat Mesra: Permohonan Visa Pelajar Atau Guru Asing

I-Fiqh: Kerana Nak Cantik, Dosa Dianggap Biasa

Diari IHEAIPP

1.

2 – 3.

4.

5.

6.

7 – 8.

9.

10.

11.

12.

13.

14.

15.

15



SAMBUTAN BULAN-BULAN AL-QURAN

Oleh: Bahagian Dakwah

Al-Quran merupakan Kitabullah terakhir yang diturunkan kepada Nabi Muhammad SAW. Ia adalah panduan hidup yang lengkap mencakupi semua aspek kehidupan manusia. Menyadari betapa pentingnya al-Quran diamalkan dalam kehidupan, Kerajaan Negeri Pulau Pinang sekali lagi telah menganjurkan Sambutan Bulan-Bulan Al-Quran Peringkat Negeri Pulau Pinang buat kali yang kedua. Sambutan ini diadakan sepanjang bulan Rejab, Syaaban dan Ramadan tahun 1432H.

Majlis Pelancaran Sambutan Bulan-Bulan Al-Quran telah disempurnakan oleh Yang di-Pertua Negeri Pulau Pinang, Tuan Yang Terutama Tun Dato' Seri Utama (Dr.) Haji Abdul Rahman bin Haji Abbas pada 2 Jun 2011M bersamaan dengan 29 Jamadilakhir 1432H bertempat di Masjid Negeri Pulau Pinang. Manakala Majlis Penutupannya pada 14 Ogos 2011M bersamaan 14 Ramadan 1432H di tempat yang sama.

Sesungguhnya Sambutan Bulan-Bulan Al-Quran ini merupakan satu wadah bagi mendekatkan masyarakat dengan al-Quran di samping menyedarkan kepentingan pengamalannya dalam kehidupan umat Islam.

Kelebihan membaca al-Quran di antaranya dapat menghilangkan kekotoran hati, menambahkan keimanan dan ketakwaan, mendapat rahmat dan perlindungan daripada Allah SWT di dunia dan akhirat.

Allah SWT berfirman dalam surah al-Maidah ayat 15 – 16 yang bermaksud:

“Sesungguhnya telah datang kepadamu cahaya kebenaran (Nabi Muhammad SAW) daripada Allah dan sebuah Kitab (Al-Quran) yang jelas nyata kebenarannya. Dengan itu Allah menunjukkan jalan keselamatan serta kesejahteraan kepada sesiapa yang mengikut keredhaanNya dan Tuhan mengeluarkan mereka daripada kegelapan (kufur) kepada cahaya (iman) yang terang benderang dengan izin-Nya dan Tuhan menunjukkan mereka ke jalan yang betul dan lurus.”

Allah SWT menerangkan dalam ayat ini dengan jelas bahawa al-Quran adalah petunjuk jalan kebenaran dan kesejahteraan yang menuju ke arah keredhaan Allah SWT. Sekiranya kita tersasar daripada jalan yang lurus, kembalilah kepada al-Quran kerana dengan izin-Nya kita dapat membentuk diri menjadi insan yang lebih bertakwa kepada Allah SWT.



TYT Yang di-Pertua Negeri Pulau Pinang sedang melancarkan Sambutan Bulan-Bulan Al-Quran Peringkat Negeri Pulau Pinang Tahun 2011

Objektif Sambutan Bulan-Bulan Al-Quran

- Membangun modal insan yang berkualiti melalui penghayatan terhadap al-Quran secara menyeluruh daripada pelbagai perspektif dan spektrum kehidupan.
- Memperkasa rasa kecintaan masyarakat yang mendalam terhadap al-Quran.
- Melahirkan intelektual dan profesional Islam yang mampu bersaing dan membangun ketamadunan berlandaskan al-Quran dan As-Sunnah.
- Mengukuhkan jalinan ukhuwah dan perpaduan di kalangan masyarakat.